

四庫全書

集部

欽定四庫全書

集部

漢魏六朝百三家集卷六十八

詳校官庶吉士<sub>臣</sub>謝恭銘

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>高 中

謄錄監生<sub>臣</sub>王利賓

欽定四庫全書

漢魏六朝百三家集卷六十八

鮑照集題詞

鮑明遠才秀人微史不立傳服官年月考論鮮  
據差可憑者虞散騎奉勅一序耳明遠松栢篇  
自敘危病中讀傅休奕集見長逝辭惻然酸懷  
草豐人滅憂生良深後掌臨海書記竟死亂兵  
謝康樂云天枉兼常其斯人乎臨川好文明遠

自恥燕雀貢詩言志文帝矜才又自貶下就之  
相時授主善用其長非禰正平楊德祖流也集  
中文章實無鄙言累句不知當時何以相加江  
文通遭逢梁武年華望暮不敢以文陵主意同  
明遠而蒙譏才盡史臣無表而出之者沈休文  
竊笑後人矣鮑文最有名者蕪城賦河清頌及  
登大雷書南齊文學傳所謂發唱驚挺操調險  
急雕藻淫艷傾炫心魂殆指是耶詩篇創絕樂

府五言李杜之高曾也顏延年與康樂齊名私  
問優劣於明遠誠心折之士顧才何如耳寧論

官閥哉

目錄

賦

遊思賦

觀漏賦

有序

傷逝賦

蕪城賦

芙蓉賦

園葵賦

舞鶴賦

野鵝賦

有序

尺蠖賦

飛蛾賦

表疏

為柳令讓驃騎表

謝秣陵令表

解褐謝侍郎表

謝解禁止表

皇孫誕育上表

征北世子誕育上表

拜侍郎上疏

侍郎報滿辭閣疏

轉常侍上疏

謝隨恩被原疏

啓

論國制啓

謝上除啓

謝賜藥啓

謝永安令解禁止啓

通世子自解啓



重與世子啓

請假啓

又

奉始興王白紵舞曲啓

書

登大雷岸與妹書

頌

河清頌

佛影頌

銘

凌煙樓銘

石帆銘

飛白書勢銘

藥奩銘

文

瓜步山楬文

[illegible]

漢魏六朝百三家集卷六十八目錄

欽定四庫全書

漢魏六朝百三家集卷六十八

明 張溥 輯

鮑照集

賦

遊思賦

雲徑兮海衛上潮兮送風秋水兮駕浦涼煙兮冒虹暮  
氣起兮遠岸黑陽精滅兮天際紅波沄沄兮無底山森

森兮萬重平隰兮巨岸通川兮瀉壑仰盡兮天經俯窮  
兮地絡望波際兮曇曇眺雲間兮灼灼乃江南之斷山  
信海上之飛鶴指煙霞而問鄉窺林嶼而訪泊撫身事  
而識苦念親愛而知樂苦與樂其何言悼人生之長役  
捨堂宇之密親坐江潭而為客對蒹葭之遂黃視零露  
之方白鴻晨驚以響湍泉夜下而鳴石結中洲之雲蘿  
託綿思於遙夕瞻荆吳之遠山望邯鄲之長陌塞風馳  
兮邊草飛胡沙起兮鴈揚翩雖燕越之異心在禽鳥而

同戚悵收情而投淚遣繁悲而自抑此日中其幾時彼  
月滿而將蝕生無患於不老奚引憂以自逼物因節以  
卷舒道與運而升息賤賣卜以當壚隱我耕而子織誠  
愛秦王之奇勇不願絕筋而稱力已矣哉使豫章生而  
可知夫何異乎叢棘

觀漏賦

有序

客有觀於漏者退而歎曰夫及遠者箭也而定遠非箭  
之功為生者我也而制生非我之情故自箭而為心不

可憑者絃因生以觀我不可恃者年憑其不可恃故以  
悲哉況乎沈華密遠輕波潛耗而感神嬰慮者又自外  
而傷壽以是思生生亦勤矣乃為賦云

佩流歎於馳年纓華思於奔月結蘭若以望楚弄叅差  
以歌越撫凝肌於遷滯鑑雕容於髣髴景有墜而易昏  
憂無方而難歇歷攻階而升隩訪金壺之盈闕觀騰波  
之吞寫視驚箭之登沒箭既沒而復登波長瀉而弗歸  
注沈穴而海漏射懸塗而電飛墮戶牖而知天掩雲霧



而測暉創百齡於纖隱積千里於空微彼崢嶸而行溢  
此冉冉而逾衰撫寸心而未改指分光而永違昔傷矢  
之奔禽聞虛弦之顛仆徒嬰办而知懼豈潛機之能覺  
惟生經之霍靡亦悲長而懼促恒證古而秉心抱空意  
其如玉波沈沈而東注日滔滔而西屬落繁馨於纖草  
殞豐華於喬木對是離而後歌據窮蹊而方哭雖接薪  
之更傳寧絕明之還續貫古今而并念信寡易而多難  
時不留乎激矢生乃急於走丸既河源之莫壅又吹波

而助瀾神休迥而多慮心輻輳而眇歡望天涯而佇念握  
雄劒而長歎嗟生民之永迷躬與後而皆恤死零落而無  
二生差池之非一理幽分於化前筭冥定於天扶與艾  
骨而招病猶割腸而興疾情殊用而俱盡事離方而同  
失聊弭志以高歌順煙雨而沈逸於是隨秋鴻而汎渚  
逐春鶯而登梁進賦詩而展念遘陳酒以排傷物不可  
以兩大時無得而雙昌薰晚華而後落槿早秀而前亡  
姑屏憂以愉思樂茲情於寸光從江河之紆直委天地

之圓方漏盈兮漏虛長無絕兮芬芳

傷逝賦

晨登南山望美中阿露團秋槿風卷寒蘿悽愴傷心悲  
如之何盡若窮煙離若翦絃如影滅地猶星殞天棄華  
宇於明世閉金扃於下泉永山河以自畢眇千齡而弗  
旋思一言於向時邈衆代於古年逝稍遠而變體浸幽  
明而改時覽篇迹之如旦婉遺意而在茲忽若謂其不  
然自惆悵而驚疑循堂廡而下降歷幃戶而升基服委

襟而褫帶器蒙管而韜絲志存業而遺績身先物而長  
辭豈重歡而可覩追前感之無期寒往暑來而不窮哀  
極樂反而有終燧已遷而禮革月既逾而慶通心微微  
而就遠跡離離而絕容白日藹而回陰閨館寂而深重  
冀憑靈於前物佇美目乎房櫳徒望思於永久邈歸來  
其何從結單心於暮條掩行淚於晨風念沈悼而誰劇  
獨嬰哀於逝躬草忌霜而逼秋人惡老而逼衰誠衰耄  
之可忌或甘願而志違彼一息之短景乃累恨之長暉

尋平生之好醜成黃塵之是非將滅耶而尚在何有去  
而無歸惟桃李之零落生有促而非夭觀龜鶴之千祀  
年能富而情少反靈質於二塗亂感悅於雙抱日月飄  
而不留命倏忽而誰保譬明隙之在梁如風露之停草  
髮迎憂而送華貌先悴而收藻共甘苦其幾人曾無得  
而偕老拂埃琴而抽思啓陳書而遐討自古來而有之  
夫何怨乎天道

蕪城賦

瀾迤平原南馳蒼梧漲海北走紫塞鴈門拖以漕渠軸  
以崑岡重江複關之興四會五達之莊當昔全盛之時  
車挂轄人駕肩屢闢撲地歌吹沸天孳貨鹽田鏹利銅  
山才力雄富士馬精妍故能侈秦法佚周令劃崇墉剗  
濬洫圖修世以休命是以板築雉堞之殷井幹烽櫓之  
勤格高五嶽袤廣三墳崱若斷岸矗似長雲製磁石以  
禦衝糊頰壤以飛文觀基局之固護將萬祀而一君出  
入三代五百餘載竟瓜剖而豆分澤葵依井荒葛冒途

壇羅虺域階關麋木魅山鬼野鼠城狐風嘯雨嘯昏  
見晨趨饑鷹厲吻寒鷗嚇雛伏越藏虎乳血餐膚崩榛  
塞路崢嶸古迺白楊早落寒草前衰稜稜霜氣軟軟風  
威孤蓬自振驚沙坐飛灌莽杳而無際叢薄紛其相依  
通池既已夷峻隅又已頽直視千里外唯見起黃埃凝  
思寂聽心傷已摧若夫藻局黼帳歌堂舞閣之基璇淵  
碧樹弋林釣渚之館吳蔡齊秦之聲魚龍爵馬之玩皆  
薰歇燼滅光沈響絕東都妙姬南國麗人蕙心紉質玉

貌絳唇莫不理魂幽石委骨窮塵豈憶同輩之愉樂離  
宮之苦辛哉天道如何吞恨者多抽琴命操為蕪城之  
歌歌曰邊風起兮城上寒井徑滅兮丘隴殘千齡兮萬  
代共盡兮何言

芙蓉賦

感衣裳於楚賦詠憂思於陳詩訪羣英之艷絕標高名  
於澤芝會春陂乎夕張寒芙蓉而水嬉抽我衿之桂蘭  
點子吻之瑜辭選羣芳之徽號

闕

抱茲性



之清芬稟若華之驚絕單蘆陽之妙手測瀨池之光潔  
爍彤輝之明媚粲雕霞之繁悅顧椒丘而非偶豈園桃  
而能埒彪炳以菑藻翠莖而紅波青房兮規接紫的兮  
圓羅樹妖淫之弱幹散萋萋之輕荷上星光而倒景下  
龍鱗而隱波戲錦鱗而夕映濯繡羽以晨過結游童之  
湘吹起榜妾之江歌備日月之溫麗非盛夏而謂何若  
乃當融風之暄盪承暑雨之平渥被瑤塘之周流繞金  
渠之屈曲排積霧而揚芬鏡洞泉而含綠葉折水以為

珠條集露而成玉潤蓬山之瓊膏輝蔥河之銀燭冠五  
華於仙草超四照於靈木雜衆姿於開卷閱羣貌於昏  
明無長袖之容止信不笑之空城森紫葉以上擢紛湘  
蘂而不傾根雖割而琯徹柯既解而絲繁感盛衰之可  
懷質始終而常清故其為芳也綢繆其為媚也奔發對  
妝則色殊比蘭則香越汎明彩於宵波飛澄華於曉月  
陋荆姬之朱顏嘆夏女之光髮恨狎世而貽賤徒愛存  
而賞沒雖凌羣以擅奇終從歲而零歇

園葵賦

風煖凌開土昌泉動游塵曝日鳴雉依隴主人拂黃冠  
拭藜杖布蔬種平圻壤通畔脩直膏畝夷敞白莖紫蒂  
豚耳鴨掌溝東陌西行三畦兩既區既鉏乃露乃映勾  
萌欲伸藂牙將放爾乃晨露夕陰霏雲四委沈雷遠震  
飛雨輕灑徐未及晞疾而不靡柔莩爰秀剛甲以解推  
葉萍布弱陰競抽萋萋翼翼沃沃油油下歲凝而被逕  
上參差而覆疇承朝陽之麗景得傾柯之所投仕非魯

相有不拔之利賓非二仲無逸馬之憂顧堇荼而莫偶  
豈蘋藻之薦羞若乃鄰老談稼女嫗歸桑拂此葦席炊  
彼稌梁甞壺援醢曲瓢卷漿乃羹乃瀹堆鼎盈筐甘旨  
脩脆柔滑芬芳消淋逐水潤胃調腸於是既飫徹盤投  
筯回小人之腹為君子之慮近觀物運遠訪師聖聲數  
後彰律理前定烏非黔黑鶴豈浴淨彼圓行而方止固  
得之於天性伊冬簞而夏裘無雙功而並盛盍然任心  
樂道安命春風夕來秋日晨映獨酌南軒擁琴孤聽篇

章間作以歌以詠魚深沈而鳥高飛孰知美色之為正

舞鶴賦

散幽經以驗物偉胎化之仙禽鍾浮曠之藻質抱清迥  
之明心指蓬壺而飛翰望崑閬而揚音匝日域以迴驚  
窮天步而高尋踐神區其既遠積靈祀而方多精含丹  
而星耀頂凝紫而煙華引圓吭之纖婉頓脩趾之洪矯  
疊霜毛而弄影振玉羽而臨霞朝戲於芝田夕飲乎瑤  
池厭江海而游澤掩雲羅而見羈去帝鄉之岑寂歸人

褰之喧卑歲崢嶸而催暮心惆悵而哀離於是窮陰殺  
節急景凋年涼沙振野箕風動天嚴嚴苦霧皎皎悲泉  
冰塞長河雪滿羣山既而零昏夜歇景物澄廓星翻漢  
迴曉月將落感寒雞之早晨憐霜鴈之違漠臨驚風之  
蕭條對流光之照灼唳清響於丹墀舞飛容於金閣始  
連軒以鳳蹕終宛轉而龍躍躑躅徘徊振迅騰摧驚身  
蓬集矯翅雪飛離網別赴合緒相依將興中止若往而  
歸颯沓於顧遷延遲暮逸翮後塵翺翥先路指會規翔

臨歧矩步態有遺妍貌無停趣奔機逗節肉暎分形長

揚

一作揚翹

緩驚並翼連聲輕迹凌亂浮影交橫衆變繁姿

參差洊密煙交霧凝若無毛質風去雨還不可談悉既  
散魂而盪目迷不知其所之忽星離而雲罷整神容而  
自持仰天居之崇絕更惆悵以驚思當是時也燕姬色  
沮巴童心恥巾拂兩停凡劒雙止雖邯鄲其敢倫豈陽  
阿之能擬入衛國而乘軒出吳都而傾市守馴養於千  
齡結長悲於萬里

欽定四庫全書

漢魏六朝百三家集  
卷六十八

十

野鵝賦

有獻野鵝於臨川王世子愍其樊繫命為之賦其辭曰  
集陳之隼以自遠而稱神栖漢之雀乃出幽而見珍此  
瑣禽其何取亦廁景而承仁捨水澤之驩逸對鐘鼓之  
悲辛豈徇利而輕命將感愛而投身入長羅之逼脅悵  
高緲之樊繫邈辭朋而別偶超煙霧而風行跨日月以  
遙逝忽瞻國而望城踐非迹於瑤塗昇弱羽於丹庭瞰  
東西之繡戶眺左右之金局貌纖殺而含悴心翻越而



慙驚若墜淵而墮谷恍不知其所寧惟君圃之珍麗實  
妙物之所殷翔海澤之輕鷗巢天宿之鳴鶉鵲程材於  
臬猛翬薦體之雕文既敷容以照景亦避翮而排雲雖  
居物以成偶終在我以非羣望征雲而延悼顧委翼而  
自傷無青雀之銜命乏赤鴈之嘉祥空穢君之園池徒  
慙君之稻粱願引身而剪迹抱末志而幽藏於是流歲  
遂遠慘節方崇雲纏海岱風拂嶠潼飛霧馳霞飄沙舞  
蓬視清池之初涸望綠林之始空立菰蒲之寒渚託隻

影而為雙宛拔啄而掩皆悲結悵而滿胃處朝晝而雅  
念假外見而遷排涉脩夜之長寂信專思而知哀風梢  
梢而過樹月蒼蒼而照臺冰依岸而早結霜託草而先  
摧斂雙翮於水裔翹孤趾於林隈情無方而雨集事有  
限而星垂在俄頃而猶悼矧窮生之所懷聞宿世之高  
賢澤無微而不均育草木而明義愛禽鳥而昭仁全殞  
卵而來鳳放乳麕而感麟雖陋生於萬物若沙漠之一  
塵苟全軀而畢命庶魂報以自申

尺蠖賦

智哉尺蠖觀機而作伸非向厚屈非向薄當靜泉渟遇  
躁風驚起軒軀以曠跨伏累氣而併形冰炭弗觸鋒刃  
靡迂逢嶮蹙踏值夷舒步忌好退之見猜哀必進而為  
蠹每驤首以瞰途常佇景而翻露故身不豫託地無前  
期動靜必觀於物消息各隨乎時從方而應何慮何思  
是以軍筭慕其權國容擬其變高賢圖之以隱淪智士  
以之而藏見笑靈蛇之久蟄羞龍德之方戰理害道而

為尤事傷生而感賤苟見義而守勇豈專取於弦箭

飛蛾賦

仙鼠伺闇飛蛾候明均靈舛化詭欲齊生觀齊生而欲  
詭各會住以憑方凌焦煙之浮景赴熙燄之明光拔身  
幽草下畢命在此堂本輕死以邀得雖糜爛其何傷豈  
學山南之文豹避雲霧而巖藏

表疏

為柳令讓驃騎表

臣言伏承詔書加臣驃騎將軍餘如故顧循空薄屢墜  
成命仰當天寵伏抱慙灼臣素陋人本絕分望適野謝  
山川之志輟耕無鴻鵠之歎宦希鄉部富期農牧夙當  
昌朝早值恩洽天網紛橫皇恩歸聖左輪不殷良馬未  
汗功半下列爵超上賞奮迹騰光參駕龍服翰起雲飛  
拂翼虹路雖曩之脫駕拖紫弛擔丹轂方之微臣彼安  
足齒齊此而歸懼塵王度況遂頻煩重彰濫越伏願天  
德曲成資始令終雨露之惠自華及殞特屈慈獎降申

愚固則綢繆之施復踰造物不勝感躍惶駭之情謹拜  
表以聞

謝秣陵令表

臣照言即日被尚書召以臣為秣陵令臣負鍾下農執  
羈末皂情有局塗志無遠立遭命逢天得汙官牒不悟  
恩澤無窮謬當獎試用謝刀筆猥承宰職豈是闇懦所  
能克任今便抵召違離省闈係戀罔極不勝下情謹拜  
表以聞

解褐謝侍郎表

臣照言臣孤門賤生操無炯迹鶉棲草澤情不及官不  
悟天明廣矚騰滯援沈觀光幽節聞道朝年榮多身限  
思非終報

謝解禁止表

臣言被宣令解臣禁止天光鄭重不可勝逢飛走知感  
矧臣人類臣聞獲過于神或憑尸祝以請得罪於君可  
因左右而謝臣自惟孤賤盜幸榮級闇流大誼猖狂世

禮竒非阮籍無保持之助才愧馮衍有輜輶之因自非  
聖朝超然覽臣於視聽之外則今日渥澤更成妄遭來  
辰萎葉終先朝草小人歲暮知能何報徒厚恩華憂懼  
歎息不任下情謹詣拜表以聞

皇孫誕育上表

兼郎中令侍郎臣照言伏承東儲積慶皇孫誕育國啓  
昌期民迎福運臺禁稱祉井廬相賀伏惟聖懷載深鴻  
念不任下情謹詣閣上表以聞



征北世子誕育上表

臣等言臣聞本枝無疆布諸前典衆多彌貴信之華封  
故德積則慶深業昌則祚廣伏承王子以中氣正月鍾  
靈納和誕躬紫閣膺祚朱紱弧矢夙陳珪璋攸覲雲光  
麗輝巖澤昭采嘉祥爰孚柔顏載晬凡在氓隸莫不忭  
悅臣雷恩踰物慶倍自中不勝殊歡溢喜謹奉表以聞

拜侍郎上疏

臣言臣北州衰淪身地孤賤衆善必違百行無一生丁

昌運自比人曹操乏端榮業謝成迹徂年空往瑣心靡  
迷褫轡投簪於斯終志束菜負薪期與相畢安此定命  
忝彼公朝不悟乾羅廣收圓明兼覽雕瓠飾笙備雲和  
之品潢汙流藻充金鼎之實鍛羽暴鱗復見翻躍枯楊  
寒炭遂起烟華未識微躬猥能及此未知陋生何以為  
報祇奉恩命憂愧增灼不勝感荷屏營之情謹詣閣拜  
疏以聞

侍郎報蒲辭閣疏

臣言臣所居職限滿今便收迹金閨雲路從茲自遠  
鯁沈藏方絕光景祇戀遲迴結涕濡泗臣器杌窮賤情  
嗜踳昧身弱涓甦地幽井谷本應守業墾畛荆苒牧雞  
園豕以給征賦而幼性猖狂因頑慕勇釋擔受書廢耕  
學文畫虎既敗學步無成反拙歸跂還陋鷺雀日晏途  
遠塊然自喪加以無良根孤伎薄既同馮衍負困之累  
復抱相如消渴之疾志逐運離事與衰合束馬埋輪絕  
游息世宿福餘慶爰遭聖明煦蒸霜霰莩甲雲露得從

下走叨迹人行操勒負羈班榮危隸矜愚訓短哀有弗  
及奉此而歸足以沒齒雖摩肌髮無報天德更冀營魂  
還能結草不勝感戀之情謹詣闕拜疏奉辭以聞

轉常侍上疏

臣言即日被中曹板轉臣為左常侍臣自惟常人觸事  
無可謬被拔擢實為光榮臣既無髣髴上報殊絕之恩  
有分每豐其過前後輕重輒得原恕獎以君子之方赦  
其不閑教訓大愆不責矜澤必如是臣所以夙夜自念

知遭遇之至深至厚也未冀未望便荷今榮欣喜感悅不敢偽讓庶保終始身命為初不勝下情謹詣閭拜疏謝以聞

謝隨恩被原疏

臣言即日被曹宣命元統內外五刑以下浩澤盪汰臣亦預焉得從漢律故謬之辨聞遭周典肆青之科大喜卒至非願所圖魚愕雞睨且悚且慙臣誠下愚不達義方然君尊臣泰豈同犬馬且常侍臣淵穆疏草即臣所

作助人為恭猶加敬憶自己率禮寧敢慢忘繇臣忤賤  
可侮可誣曾參殺人臣豈無過寢病幽栖無援朝列身  
孤節卑易成論確幸大明臨下仁道毓物澤泊翺走臣  
覃末慶然古人有言楊者易生之木也一人植之十人  
拔之無生楊矣何則植之者難拔之者易況臣一植之  
功不立衆拔之過屢至同彼風霜異此貞脆書稱天秩  
有禮易載神福在謙臣之謙禮理謝福秩仰銜俯媿行  
歎坐戚即欲顛沛拜恩下庭但臣病久柴羸不堪冒涉

小得趨馳星駕登路不勝荷佩之誠謹上疏以聞

啓

論國制啓

臣啓臣聞尺之量錦工者裁之衰丈之木繩墨在焉事  
無巨細非法不行當今世閒政睦藩國相望君舉必書  
動成准式息躬聖壤十有餘載條制節文宜其備矣諸  
王列封動靜兼該而竊見國之處事未盡善臣之暗蔽  
私心有惜伏見彭城國舊制猶有數卷雖多殊革大綱

可依愚謂宜令掌故刊而撰之上著朝典藩邦之度下  
揆國訓繁簡之誼傍酌州府寬猛之中章程久具永為  
恒制豈伊今美乃足貴之將來臣忝充直員脫以啓聞  
煩而非要伏追慙悚謹啓

謝上除啓

臣言被宣賜臣上除臣伏事日淺蒙荷已豐天澤所及  
且喜且懼但臣自丁常桓來塗階級非所敢冀今日榮  
願直爾不少冒乞停止上除伏願重許干穢悚息



謝賜藥啓

臣衛躬不謹養命無術情淪五難妙謝九法颺落先傷  
衰疴早及遐澤近臨猥委存卹痛同山嶽蒙靈藥之賜  
惠非河間謬仙使之屈恩逾脯糗惠重帷席荷對銜慙  
伏抱衿渥

謝永安令解禁止啓

臣田茅下第質非謝品志終四民希絕三仕邀世逢辰  
謬及推擇恩成曲積榮秩兼過雖誓投織生昊天罔極

迄無犬馬孤慙星歲加以淪節雪飈沈誠歎晦值天光  
燭幽神照廣察澡臈從宥與物更稟遂睇矚陽春湔汰  
秋水綴翼雲條葺鮮決沼洗膽明目抃手太平重甄再  
造含氣孰比不悟乾陶彌運復垂埏飾矯迹升等改觀  
非服振纓珥筆聯承貴寵豈臣浮朽所可恭從實非愚  
曹所宜循踐瑣族易灰脫漏已迫空荷載燾終責仰復  
飲冰肅事懷火畢命不勝屏營之情謹啓事以聞

通世子自解啓

僕以短椀無用於世遭逢謬幸被受恩榮誠願論畢久  
宜捐落仁眷篤終復獲淹停感今惟昔銜佩無已但自  
無堪尸素累載腹心之愧寤寐為憂今請解所職願蒙  
矜許自奉清塵于茲六祀墜辰永往遺恩在心執紙哽  
咽言不自宣

重與世子啓

奉還誨深承殷勤篤眷之重披讀未終悲愧交集僕以  
常人所蒙隆厚久應知退非適今日銜恩戀德用缺進

心今者之請必願鑒許且僕棲遲無事咫尺館第餐粟風微非旦則夕居職還私兩者無異而於僕無用有以自處豈非仁念始終之惠重致于日彌深慙感

請假啓

臣啓臣居家之治上漏下濕暑雨將降有懼崩壓比欲完葺私寡功力板鋪絢塗必須躬役冒欲請假三十日伏願天恩賜垂矜許于啓復追悚息謹啓

又

臣啓臣所患彌留病軀沈痼自近蒙歸頻更頓處日夜  
間困或數四委然一弊瞻景待化加以凶衰嬰遭慘悼  
終鮮兄弟仲由所哀臣實百罹孤苦風雨天倫同氣實  
惟一妹存沒永訣不獲計見封瘞泉壤臨送私懷感恨  
情痛兼深臣母年老經離憂傷服簋食淡羸耗增疾心  
計焦迫進退罔躋冒乞中假百日伏願天慈賜垂矜許  
臣違福履身事屯悴歎息和景掩淚春風執啓涕結伏  
追惶悚謹啓

奉始興王白紵舞曲啓

侍郎臣鮑照啓被教作白紵舞歌辭謹竭庸陋裁為四  
曲附啓上呈識方渙悴思塗猥局言既無雅聲未能文  
不足以宣贊聖旨抽拔妙實謹遣簡餘慙隨悚盈謹啓

書

登大雷岸與妹書

吾自發寒雨全行日少加秋潦浩汗山溪猥至渡沂無  
邊險徑遊棧石星飯結荷衣水宿旅客貧辛波路壯闊

始以今日食時僅及大雷塗登千里日踰十晨嚴霜慘  
節悲風斷肌去親為客如何如何向因涉頓憑觀川陸  
邀神清渚流睇方曠東顧五洲之隔西眺九派之分窺  
地門之絕景望天際之孤雲長圖大念隱心者久矣南  
則積山萬狀爭氣負高含霞飲景參差代雄凌跨長隴  
前後相屬帶天有匝橫地無窮東則砥原遠隰亡端靡  
際寒蓬夕卷古樹雲平旋風四起思鳥羣歸靜聽無聞  
極視不見北則陂池潛演湖脈通連葦蒿攸積菰蘆所

繁栖波之鳥水化之蟲智吞愚彊捕小號噪驚聒紛乎  
其中西則迴江永指長波天合滔滔何窮漫漫安竭創  
古迄今舳艫相接思盡波濤悲滿潭壑煙歸八表終為  
野塵而是注集長寫不測修靈浩盪知其何故哉西南  
望廬山又特驚異基壓江潮峯與辰漢連接上常積雲  
霞雕錦縟若華夕曜巖澤氣通傳明散綵赫似絳天左  
右青靄表裏紫霄從嶺而上氣盡金光半山以下純為  
黛色信可以神居帝郊鎮控湘漢者也若深洞所積溪



壑所射鼓怒之所陲擊湧腹之所宕滌則上窮荻浦下  
至狶洲南薄鷺爪北極雷澱削長埤短可數百里其中  
騰波觸天高浪灌日吞吐百川寫泄萬壑輕烟不流華  
鼎振渚弱草朱靡洪連隴颯散渙長驚雷透箭疾穹溘  
崩聚坻飛嶺覆回沫冠山奔濤空谷礧石為之摧碎礪  
岸為之齧落仰視大火俯聽波聲愁魄脅息心驚慄矣  
至於繁化殊育詭質怪章則有江鷺海鴨魚鮫水虎之  
類豚首象鼻芒鬚針尾之族石蟹土蚌燕箕雀蛤之儔

折甲曲牙逆鱗返舌之屬掩沙漲被草渚浴雨排風吹  
澇弄翮夕景欲沈曉霧將合孤鶴寒嘯遊鴻遠吟樵蘇  
一歎舟子再泣誠足悲憂不可說也風吹雷颺夜戒前  
路下弦内外望遠所屆寒暑難適汝專自慎夙夜戒護  
勿我為念恐欲知之聊書所覩臨塗草感辭意不周

頌

河清頌有序

臣聞善談天者必徵象於人工言古者先考績於今鴻

義以降遐哉邈乎鏤山嶽雕篆素昭德垂勲可謂多矣  
而史編唐堯之功載格于上下樂登文王之操稱於昭  
于天素狐玄玉聿彰符命朴牛文螭爰定祥厯魚鳥動  
色禾雉興讓皆物不盈皆而美溢金石詩人於是不作  
頌聲為之而寢庸非惑歟自我皇宋之承天命也仰符  
應龍之精俯協河龜之靈君圖帝寶粲爛瑰英固以業  
光曩代事華前德矣聖上天飛踐極迄茲二十有四載  
道化周流玄澤汪濊地平天成上下含熙文同軌通表

裏褫福曜德中區黎庶知讓觀英遐表夷貊懷惠恤勤  
秩禮散露臺之金舒國賑民傾鉅橋之粟約違迫脅奢  
去泰甚讌無留飲畋不盤樂物色異人優游鯁直顯靡失  
心幽無怨魄精炤日月事洞天情故不勞仗斧之臣號  
令不嚴而自肅無辱鳳舉之使靈恠不召而自彰萬里  
神行颺塵不起農商野廬邊城偃拆異馬南金填委內  
府馴象西爵充羅外囿阿紉纂組之饒衣覆宗國魚鹽  
杞梓之利傍瞻荒遐士民殷富五陵既有慙德宮宇宏

麗三川莫之能比閭閻有盈歌吹無絕朱輪疊轍華冕  
重肩豈徒世無窮人民獲休息朝呼韓罷酤鐵而已哉  
是以嘉祥累仍福應尤盛青丘之狐丹穴之鳥栖阿閭  
遊禁園金芝九莖木禾六仞秀銅池發膏畝宜以謁薦  
郊廟和協律呂烟霏霧集不可勝紀然而聖上猶昧旦  
夙興若有望而未至宏規遠圖如有追而莫及神明之  
貺推而弗居也是以琬碑鏐檢盛典蕪而不治朝神省  
方大化抑而未許崇文協律之士蘊偉頌於外坐朝陪

宴之臣懷揄揚於內三靈佇睠九壤注心既有日矣  
歲宮乾維月躔蒼陸長河巨濟異源同清澄波萬壑潔  
淵千里斯誠曠世偉觀昭啓皇明者也語曰影從表瑞  
從德此其效焉宣尼稱鳳鳥不至河不出圖傳曰俟河  
之清人壽幾何皆傷不可見者也然則古人所未見者  
今殫見之矣孟軻曰千載一聖是旦暮也豈不信哉夫  
四皇六帝樹聲長世大寶也澤浸羣生國富刑清鴻德  
也制禮裁樂淳風遷俗文教也殊華逋羯東顧絳闕武

功也鳴鳥躍魚滌穢河渠至祥也大寶鴻德文教武功  
其崇如此幽明協贊民祇與能厥應如彼唯天為大堯  
實則之皇哉唐哉疇與為讓抑又聞之勢之所覃者淺  
則美之所傳者近道之所感者深則慶之所流者遠是  
以豐功避命潤色滕策盛德形容藻被歌頌察之上代  
則奚斯吉甫之徒鳴玉鑒於前視之中古則相如王褒  
之屬馳金羈於後絕景揚光清埃繼路故班固稱漢成  
之世奏御者千有餘篇文章之盛與三代同風繇是言

之斯迺臣子舊職國家通議不可輟也臣雖不敏敢不勉乎乃作頌曰

窺刊崩石捃逸殘竹巢風寂寥義埃綿邈鉅生大年瞻  
學淵聞輦繡成景粉纈顙軒徒翫井科未覩天河亘古  
通今明鮮晦多千齡一見書史登歌旋我皇駕揆景方  
塗凌周躡殷蹶唐轢虞如彼七緯累璧重珠高祖撥亂  
首物定靈更開天地再鑄羣生帝御三條龍步八垓朔  
南暨教海北騰聲淪深格高決遐洞冥龜鼎遷宋玄圭



告成大明方微鴻光中微聖命誰堪皇厯攸歸謀從筮協  
神與民推黃旗西映紫蓋東輝納瑞螭玉升政衡璣金  
輪約飾珠冕龍衣正位北辰垂拱南面天下何思日用  
罔倦復禮歸仁觀恒通變一物有違戚言毀膳非躬簡  
法厚下安宅謙德彌光損道滋益孝崇饗祀勤隆耕藉  
饘酎秋羊封瑾春酪嬰耄兼梁鰥孤重帛體由學染俗  
以教遷禮導刑清樂鬯風宣分衢讓齒折訟推田野旌  
伏彥朝賞登賢儒訓優柔武節焱鷲文憲精引戎容屏

利樞鈐明審程駿周備吏礪平端民羞幸覲桴鼓凝埃  
烽驛垂轡銷我長劍歸為農器閩外水鄉郵表炎國隴  
首西南勃尾東北赭赭嶺丹渾渾泉黑移琛雲勉轉集  
印焚狼歌薦功鳥譚陳德治博化光民阜財盛班白行  
謠清綺高詠雲表幽和物章明慶麗植雕質蠢行藻性  
仁草晨莩德宿宵映海無隱颺山有黃落牛羊內首閭  
戶外拓端木朋生祥禽輩作薰風蕩閨飴露流閭器範  
神妙劑調象藥匪直也斯偉慶方溱注彼四瀆媚此雙

川伏靈遙紀閔眊遐年澄波海嶽鏡流蕊山泉室凝澱  
水府清涓俛瞰夷都降眊驪淵朱宮潛耀紫閣陰鮮昔  
在爽德王風不昌迺溢迺竭或壅或亡潔源濫壑曾是  
未央先民永慨大道悠長云何其瑞實鍾我皇聞諸師  
說天竦聽密介焉如響匪遠惟疾矧是皇心妙夫貞一  
左右天經戶牖人術許暮布簡絲言盈室穢有綿祀清  
豈崇日一人之慶吹萬粟和靈根方固脩源重波副睿  
貳哲帝體皇柯景雲蔚嶽秀星駢羅垂光九野騰響四

遐輔車鼎足槃石虎牙世匹周室基永漢家泰階既平  
洪河既清大人在上區宇文明樵夫議道漁父濯纓臣  
照作頌鋪德樹聲

佛影頌

形生麗怪神照潭寂驗幽以明考心者迹六塵煩苦五  
道綿劇乃炳舟梁爰悟淪溺色丹貌續留相瓊石金光  
絕見玉毫遺靚俾昏作朗效順去逆

銘

凌烟樓銘

有序

臣聞憑颺薦響唱微效長垂波鑒景功少致深是以冰  
臺築乎魏邑鳳閣起於漢京皆所以贊生通志感悅幽  
情者也伏見所製凌烟樓棲置崇迥延瞰平寂即秀神  
皋因基地勢東臨吳甸西眺楚關奔江永寫鱗嶺相聳  
重樹窮天通原盡目悲積陳古賞絕舊年誠可以暉曠  
高明藻澈遠心矣夫識緣感傾事待言彰匪言匪述綿  
世罔傳敢作銘曰

巖巖崇樓藐藐層隅階基天削戶牖雲區瞰江列楹望  
景延除積清風路合綵烟塗俯窺淮海俛眺荆吳我王  
結駕藻思神居宜此萬春修靈所扶

飛白書勢銘

秋毫精勁霜素凝鮮霑此瑤波染彼松烟超工八法盡  
奇六文鳥企龍躍珠解泉分輕如游霧重似崩雲絕鋒  
劍摧驚勢箭飛差池驚起振迅鴻歸臨危制節中險騰  
機圭角星芒明麗爛逸絲縈髮垂平理端密盈尺錦兩片

字金溢故仙芝煩弱既匪足雙蟲虎瑣碎又安能匹君  
子品之是最神筆

藥奩銘

歲賈走丸生獸墮墻時無驟得年有遐方水玉出煙靈  
飛生光龜文電衣龍綵雲裳九芝八石延正盪斜二脂  
六體振衰返華毛姬餌葉鳳子藏花景絕翠虬氣隱頰  
霞深神罕別妙竒不揚或繁虎杖或亂蛇牀故世不可  
以服未達不可以嘗眩睛逆目是乃為良

石帆銘

應風剖流息石橫波下漑地軸上獵星羅吐湘引漢歛  
蠡吞沱西歷岷冢北瀉淮河眇森弘藹積廣連深淪天  
測際亘海窮陰雲旌未起風柯不吟崩濤山墜鬱浪雷  
沈在昔鴻荒刊啓源陸表裏民邦經緯烏服瞻貞視晦  
坎水巽木乃剡乃鏹既剡既斷飛深浮遠巢潭館谷涉  
川之利謂易則難臨淵之戒曰危乃安泊潛輕濟冥表  
勤言穆戎遂留昭御不還徒悲猿鶴空駕滄煙君子彼




想祇心載惕林簡松枯水採龍鷁覘氣涉潮投祭沈璧  
揆檢含圖命辰定厯二嶠虎口周王夙趨九折羊腸漢臣  
電驅潛鱗浮翼爭景乘虛衡石頰鯨帝子察殂青山斷  
河后父沈軀川吏掌津敢告訪途

瓜步山楬文

歲舍龍紀月巡烏張鮑子辭吳客楚指究歸揚道出關  
津升高問途北眺羣鄉南曠炎國分風代川揆氣閩澤  
四睨天宮窮曜星絡東窺海門候景落日游精八表駛

視四遐超然永念意類交橫信哉古人有數寸之簷持  
千鈞之關非有其才施處勢要也爪步山者亦江中眇小  
山也徒以因迫為高據絕作雄而凌清瞰遠擅奇含秀  
是亦居勢使之然也故才之多少不如勢之多少遠矣  
仰望穹垂俯視地域涕洟江河疣贅丘嶽雖奮風漂石  
驚電剖山地綸維陷川闢毀宮毫盈髮虛曾未注言汎  
乎沈河浮海之高遺金椎壁之奇四遷八聘之策三黜  
五逐之疵販交買名之薄吮癰舐痔之卑安足議其是

非



漢魏六朝百三家集卷六十八

欽定四庫全書

集部

漢魏六朝百三家集卷

六十九  
七十

詳校官庶吉士

臣謝恭銘

主事銜

臣徐以坤覆勘

總校官檢討

臣

何思鈞

校對官中書

臣

高中

謄錄監生

臣

王利賓

欽定四庫全書

漢魏六朝百三家集卷六十九

鮑照集

目錄

樂府

採桑

代蒿里行

代挽歌

代東門行

代放歌行

代陳思王京洛篇

代門有軍馬客行

代權歌行

代白頭吟

代東武吟

代別鶴操

代出自薊北門行

代陸平原君子有所思行

代悲哉行

代陳思王白馬篇

代昇天行

松柏篇

并序

代苦熱行

代朗月行



代堂上歌行

代結客少年場行

扶風歌

代少年時至衰老行

代陽春登荆山行

代貧賤苦愁行

代邊居行

代邽街行

蕭史曲

王昭君

吳歌三首

採菱歌七首

幽蘭五首

中興歌十首

代白紵舞歌詞四首

代白紵曲二首

代鳴鴈行

擬行路難十八首

梅花落

代淮南王

代雉朝飛

代北風涼行

代空城雀

代夜坐吟

代春日行

詩

侍宴覆舟山二首

從拜陵登京峴

蒜山被始興王命作

登廬山

登廬山望石門

從登香爐峯

從庾中郎遊園山石室

登翻車峴

登黃鶴磯

登雲陽九里埭

自礪山東望震澤

三日遊南苑

贈故人馬子喬六首

荅客

和王丞

日落望江贈荀丞

秋日示休上人

答休上人

吳興黃浦亭庾中郎別

與伍侍郎別

送別王宣城

送從弟道秀別

贈傅都曹別

和傅大農與僚故別

送盛侍郎錢候亭

與荀中書別

從過舊宮

從臨海王上荆初發新渚

還都道中三首

上潯陽還都道中

還都至三山望石頭城

還都口號

行京口至竹里

登後渚

岐陽守風

發長松遇雪

詠史

蜀四賢詠



擬古八首

紹古辭七首

學古

古辭

擬青青陵上柏

學劉公幹體五首

擬阮公夜中不能寐

學陶彭澤體

數詩

建除詩

白雲

臨川王服竟還田里

行樂至城東橋

園中秋散

觀圃人藝植

遇銅山掘黃精

見賣玉器者

并序

懷遠人

夢歸鄉

春羈

歲暮悲

在江陵歎年傷老

夜聽妓二首

翫月城西門解中

喜雨

苦雨

詠白雪

三日

詠秋

秋夕

秋夜二首

和王護軍秋夕

和王義興七夕

冬至

冬日

望水

望孤石

山行見孤桐

詠雙燕二首

酒後

講易

可愛

夜聽聲

咏老

春咏

字謎三首

贈顧墨曹

聯句

在荊州與張使君李居士聯句

與謝尚書莊三聯句

月下登樓聯句

漢魏六朝百三家集卷六十九目錄

欽定四庫全書

漢魏六朝百三家集卷六十九

明張溥輯

鮑照集

樂府

採桑

以下  
五言

季春梅始落工女事蠶作採桑淇水間還戲上宮閣早  
蒲時結陰晚篁初解籜諠諠霧滿閨融融景盈幕乳燕



逐草蟲巢蜂拾花萼是節最暄妍佳服又新爍綿

玉臺作飲

歡對迥塗揚歌弄場藿抽琴試杼思薦珮果成託承君  
郢中美服義久心諾衛風古愉艷鄭俗舊浮薄靈願悲  
渡湘宓賦笑瀟洛盛明難重來淵意為誰涸君其且調  
絃桂酒妾行酌

代蒿里行

同盡無貴賤殊願有窮伸馳波催永夜零露逼短晨結

一作驅

我幽山駕去此滿堂親虛容遺紉佩實貌戢衣巾

斗酒安可酌尺書誰復陳年代稍推遠懷抱日幽淪人生良自劇天道與何人齎我長恨意歸為狐兔塵

代挽歌

獨處重冥下憶昔登高臺傲岸平生中不為物所裁埏門只復閉白蟻相將來生時芳蘭體小蟲今為災玄鬢無復根枯體依青苔憶昔好飲酒素盤進青梅彭韓及廉藺疇昔已成灰壯士皆死盡餘人安在哉

代東門行

傷禽惡弦驚倦客惡離聲離聲斷客情宿御皆涕零涕  
零心斷絕將去復還訣一息不相知何況異鄉別遙遙  
征駕遠杳杳白日晚居人掩閨卧行子夜中飯野風吹  
草木行子心腸斷食梅常苦酸衣葛常苦寒綠竹徒滿  
座憂人不解顏長歌欲自慰彌起長恨端

代放歌行

蓼蟲避葵藿習苦不言非小人自齷齪安知曠士懷雞  
鳴洛城裏禁門平旦開冠蓋縱橫至車騎四方來素帶

曳長飈華纓結遠埃日中安能止鐘鳴猶未歸夷世不  
可逢賢君信愛才明慮自天斷不受外嫌猜一言分珪  
爵片善辭草萊豈伊白璧賜將起黃金臺今君有何疾  
臨路獨遲迴

代陳思王京洛篇

玉臺作煌  
煌京洛行

鳳樓十二重四戶八綺窻繡桷金蓮花桂柱玉盤龍珠  
簾無隔露羅幌不勝風寶帳三千所為爾一朝容揚芬  
紫煙上垂綵綠雲中春吹回白日霜歌落塞鴻但懼秋

塵起盛愛逐衰蓬坐視青苔滿卧對錦筵空琴瑟縱橫  
散舞衣不復縫古來共歇薄君意豈獨濃唯見雙黃鵠  
千里一相從

代門有車馬客行

門有車馬客問客何鄉士捷步往相訊果得舊鄰里悽  
悽聲中情慊慊增下俚語昔有故悲論今無新喜清晨  
相訪慰日暮不能已歡戚競尋緒談調何終止辭端竟  
未究忽唱分途始前悲尚未弭後感方復起嘶聲盈我

口談言在君耳手迹可傳心願爾篤行李

代權歌行

羈客離嬰時飄飄無定所昔秋寓江介茲春客河許往  
戢于役身願言永懷楚泠泠儵疏潭邕邕鴈循渚颺戾  
長風振搖曳高帆舉驚波無留連舟人不躊躇

代白頭吟

直如朱絲繩清如玉壺冰何慙宿昔意猜恨坐相仍人  
情賤恩舊世議逐衰興毫髮一為瑕丘山不可勝食苗

實碩鼠點白信蒼蠅鳬鵠遠成美薪芻前見陵申黜褒  
女進班去趙姬升周王日淪惑漢帝益嗟稱心賞猶難  
恃貌恭豈易憑古來共如此非君獨撫膺

代東武吟

主人且勿諠賤子歌一言僕本寒鄉士出身蒙漢恩始  
隨張校尉占

一作召

募到河源後逐李輕車追虜窮塞垣

密塗亘萬里寧歲猶七奔肌力盡鞍甲心思歷涼溫將  
軍既下世部曲亦罕存時事一朝異孤續誰復論少壯

辭家去窮老還入門腰鎌刈葵藿倚杖牧鷄豚昔如韝  
上鷹今似檻中猿徒結千載恨空負百年怨棄席思君  
幄疲馬戀君軒願垂晉主惠不媿田子魂

代別鶴操

雙鶴俱起時徘徊滄海間長弄若天漢輕軀似雲懸幽  
客時結侶提攜遊三山青繳凌瑤臺丹羅籠紫煙海上  
悲風急三山多雲霧散亂一相失驚孤不得住緬然日  
月馳遠矣絕音儀有願而不遂無怨以生離鹿鳴在深



草蟬鳴隱高枝心自有所存

一作懷

旁人那得知

代出自薊北門行

羽檄起邊亭烽火入咸陽徵騎屯廣武分兵救朔方嚴  
秋筋竿勁虜陣精且彊天子按劍怒使者遙相望雁行  
緣石徑魚貫度飛梁簫鼓流漢颺旌甲被胡霜疾風衝  
塞起沙礫自飄揚馬毛縮如蝟角弓不可張時危見臣  
節世亂識忠良投軀報明主身死為國殤

代陸平原君子有所思行

西上登雀臺東下望雲闕層閣肅天居馳道直如髮繡  
囊結飛霞璇題納行月築山擬蓬壺穿池類溟渤選色  
遍齊岱徵聲匝邛越陳鐘陪夕讌笙歌待明發年貌不  
可還身意會盈歎蟻壤漏山阿善作河絲淚毀金骨器惡  
含滿敬物忌厚生沒智哉衆多士服理辨昭晰

代悲哉行

羈人感淑節緣感欲回轍我行詎幾時華實驟舒結覩  
實情有悲瞻華意無悅覽物懷同志如何復乖別翩翩

翔禽羅闕闕鳴鳥列翔鳴尚儔偶所歎獨乖絕

代陳思王白馬篇

白馬駢角弓鳴鞭乘北風要途問邊急雜虜入雲中閉  
壁自往夏清野徑還冬僑裝多闕絕旅服少裁縫埋身  
守漢境一作節沈命對胡封薄暮塞雲起飛沙被遠松舍

悲望兩都楚歌登四墉丈夫設計誤懷恨逐邊戎棄一作

罷

別中國愛邀異胡馬功去來今何道卑賤生所鍾但

令塞上兒知我獨為雄

代昇天行

家世宅闕輔勝帶宦王城備聞十帝事委曲兩都情倦  
見物興衰驟覩俗屯平翩翻若回掌恍惚似朝榮窮途  
悔短計晚志重

一作愛

長生從師入遠嶽結友事仙靈五

圖

一作芝

發金記九籀隱丹經風餐委松宿雲臥恣天行

冠霞登綠閣解玉飲椒庭暫遊越萬里少

一作近

別數千

齡鳳臺無還駕簫管有遺聲何當與汝曹啄腐共吞腥

松柏篇 并序

余患脚上氣四十餘日知舊先借傳玄集以余病劇  
遂見還開裘適見樂府詩龜鶴篇於危病中見長逝  
詞惻然酸懷抱如此重病彌時不差呼吸乏喘舉目  
悲矣火藥間闕而擬之

松柏受命獨歷代長不衰人生浮且脆孰若晨風悲東  
海迸逝川西山導落暉南廓一作郊悅籍短蒿里收永歸

諒無疇昔時百病起盡期志士惜牛刀忍勉自療治傾  
家行藥事顛沛去迎醫徒備火石苦奄至不得辭龜齡

安可獲岱宗限已迫睿聖不得留為善何所益捨此赤  
縣居就彼黃壚宅永離九原親長與三辰隔屬纊生望  
盡闔棺世業埋事痛存人心根結亡者懷祖葬既云及  
壙隧亦已開室族內外哭親疎同共哀外姻遠近至名  
列通夜臺扶輿出殯宮低回戀庭室天地有盡期我去  
無還日居者今已盡人事從此畢火歇煙既沒形銷聲  
亦滅鬼神來依我生人永辭訣大暮杳悠悠長夜無時  
節鬱湮重冥下煩冤難具說安寢委沈冥戀戀念平生

事業有餘結刊述未及成資儲無擔石兒女皆孩嬰一朝放捨去萬恨纏我情追憶世上事束教已自拘明發靡怡愈夕歸多憂虞轍閒晨逕荒撤宴式酒濡知今暝日苦恨失爾時娛遙遙遠民居獨埋深壤中墓前人跡滅冢上草日豐空林響鳴蜩高松結悲風長寐無覺期誰知逝者窮生存處交廣連榻舒華茵已沒一何苦楷哉不容身昔日平居時晨夕對六親今日掩柩何一見無諧因禮席有降殺三齡速過隙几筵就收撤室宇改

疇昔行女遊歸途仕子復王役家世本平常獨有亡者  
劇時祀望歸來四節靜瑩丘孝子撫墳號父兮知來不  
欲還心依戀欲見絕無由煩冤荒隴側肝心盡崩抽

代苦熱行

赤阪橫西阻火山赫南威身熱頭且痛鳥墜魂來歸湯  
泉發雲潭焦烟起石圻日月有恒昏雨露未嘗晞丹蛇  
踰百尺玄蜂盈十圍含沙射流影吹蠱病行暉瘴氣晝  
薰體茵露夜霑衣饑餒莫下食晨禽不敢飛毒涇尚多



死度瀘寧具腓生軀陷死地昌志登禍機戈船榮既薄  
伏波賞亦微爵輕君尚惜士重安可希

代朗月行

朗月出東山照我綺窓前  
窓中多佳人被服妖且妍  
靚粧坐帷裏當戶弄清絃  
鬢奪衛女迅體絕飛燕  
先為君歌一曲當作朗月篇  
酒至顏自解聲和心亦宣  
千金何足重所存意氣間

代堂上歌行

四坐且莫諠聽我堂上歌昔仕京洛時高門臨長河出  
入重宮裏結友曹與何車馬相馳逐賓朋好容華陽春  
孟春月朝光散流霞輕步逐芳風言笑弄丹葩暉暉朱  
顏酡紛紛織女梭滿堂皆美人目成對相娥雖謝侍君  
開明粧帶綺羅箏笛更彈吹高唱好相和萬曲不闌心  
一曲動情多欲知情厚薄更聽此聲過

代結客少年場行

驄馬金絡頭錦帶佩吳鉤失意杯酒間白刃起相讐追

兵一旦至負劒遠行遊去鄉三十載復得還舊丘升高  
臨四關表裏望皇州九衢平若水雙闕似雲浮扶宮羅  
將相夾道列王侯日中市朝滿車馬若川流擊鐘陳鼎  
食方駕自相求今我獨何為埒堦懷百憂

扶風歌

昨辭金華殿今次鴈門縣寢臥握秦戈棲息抱越箭忍  
悲別親知行泣隨征傳寒烟空徘徊朝日乍舒卷

代少年時至衰老行

憶昔少年時馳逐好名晨結友多貴門出入富兒鄰綺  
羅艷華風車馬自揚塵歌唱青齊女彈箏燕趙人好酒  
多芳氣饋味厭時新今日每相念此事邈無因寄語後  
生子作樂當及春

代陽春登荆山行

旦登荆山頭崎嶇道難遊早行犯霜露苔滑不可留極  
眺入雲表窮目盡帝州方都列萬室層城帶高樓奕奕  
朱軒馳紛紛縞衣流日氛映山浦暄霧逐風收花木亂

平原桑柘綿平疇攀條弄紫莖藉露折芳柔遇物雖成  
趣念者不解憂且共傾春酒長歌登山丘

代貧賤苦愁行

湮沒雖死悲貧苦即生劇長歎至天曉愁苦窮日夕盛  
顏當少歇鬢髮先老白親友四面絕朋知斷三益空庭  
慙樹萱藥餌愧過客貧年忘日時黯顏就人惜俄傾不  
相酬恹恹面已赤或以一金恨便成百年隙心懷千條  
計事未見一獲運圯津塗塞遂轉死溝洫以此窮百年

不如還窻旁

代邊居行

少年遠京陽遙遙萬里行  
陋巷絕人徑茅屋摧山岡  
不覩車馬迹但見麋鹿場  
長松何落落丘隴無復行  
邊地無高木蕭蕭多白楊  
盛年日月盡一去萬恨長  
悠悠世中人爭此錐刀忙  
不憶貧賤時富貴輒相忘  
紛紛徒滿目何闕慨予傷  
不如一畝中高會挹清漿  
遇樂便作樂莫使候朝光

代邽街行

一作去邪行

竚立出門衢遙望轉蓬飛蓬去舊根在連翩逝不歸念  
我捨鄉俗親好久乖違慷慨懷長想惆悵戀音徽人生  
隨事變遷化焉可祈百年難必果千慮易盈虧

簫史曲

簫史愛長年羸女蒼童顏火粒願排棄霞霧好登攀龍  
飛逸天路鳳起出秦關身去長不返簫聲時往還

王昭君

既事轉蓬遠心隨鴈路絕霜鞞旦夕驚邊笳中夜咽

吳歌三首

夏口樊城岸曹公却月戍但觀流水還識是儂流下  
夏口樊城岸曹公却月樓觀見流水還識是儂淚流  
人言荆江狹荆江定自濶五兩了無聞風聲那得達

採菱歌七首

驚舠馳桂浦息棹偃椒潭簫弄澄湘北菱歌清漢南  
弭榜寒蕙萸傳唱紉薰若含傷捨泉花營念採雲萼



睽澗逢暄新悽怨值妍華秋心不可盪春思亂如麻

要艷雙嶼裏望美兩洲間裊裊風出浦容容

樂府作  
沈沈日

向山

烟曠越嶂深箭迅楚江急空抱琴中悲徒望近闌泣  
緘歎凌珠淵收慨上金堤春芳行歇落是人方未齊  
思今懷近憶望古懷遠識懷古復懷今長懷無終極

幽蘭五首

傾輝引暮色孤景畱思顏梅歇春欲罷期渡往不還

簾委蘭蕙露帳含桃李風攬帶昔何道坐令芳節終  
結佩徒分明抱梁輒乖忤華落知不終空愁坐相誤  
眇眇蛸挂網漠漠蠶弄絲空慙不自信怯與君畫期  
陳國鄭東門古今共所知長袖暫徘徊駟馬停路岐

中興歌十首

千冬遲一春萬夜視朝日生平值中興歡起百憂畢  
中興太平運化清四海樂祥景照玉臺紫烟遊鳳閣  
碧樓含夜月紫殿爭朝光綵池散蘭麝風起自生芳

白日照前窻玲瓏綺羅中美人掩輕扇含思歌春風  
三五容色滿四五妙華歇已輸春日歡分隨秋光沒  
北出湖邊戲前還苑中遊飛縠繞長松馳管逐波流  
九月秋水清三月春花滋千金逐良日皆競中興時  
窮泰已有分壽夭復屬天既見中興樂莫持憂自煎  
襄陽是小地壽陽非帝城今日中興樂遙冶在上京  
梅花一時艷竹葉千年色願君松柏心採照無窮極

代白紵舞歌詞四首

以下  
七言

吳刀楚製為佩褱  
織羅霧縠垂羽衣  
含商咀徵歌露晞  
珠履颯沓紉袖飛  
淒風夏起素雲回  
車急馬煩客忘歸  
蘭膏明燭承夜輝

桂宮柏寢擬天居  
朱爵文憲韜綺疏  
象牀瑤席鎮犀渠  
雕屏匝匝組帷

一作帳

舒秦箏趙瑟挾笙竽  
垂璫散珮盈

玉除停觴不御欲  
誰須

三星參差露霑濕  
絃悲管清月將入  
寒光蕭條候蟲急  
荆王流歎楚妃泣  
紅顏難長時易戰  
凝華結藻久延立

非君之故豈安集

池中赤鯉庖所捐琴高乘去騰上天命逢福世丁湓思  
一作徵命逢  
福丁湓思簪金藉綺升曲筵思君厚德委如山潔誠

洗志期暮年烏白馬角寧足言

代白紵曲二首

朱唇動素腕舉洛陽少年邯鄲女古稱淶水今白紵催  
絃急管為君舞窮秋九月荷葉黃北風驅鴈天雨霜夜  
長酒多樂未央

春風澹蕩俠思多天色淨淥氣妍和含桃紅萼蘭紫芽  
朝日灼爍發園華卷幌結帷羅玉筵齊謳秦吹盧女絃  
千金顧笑買芳年

代鳴鴈行

邕邕鳴鴈鳴始旦齊行命侶入雲漢中夜相失羣離亂  
留連徘徊不忍散憔悴容儀君不知辛苦風霜亦何為

擬行路難十八首

以下  
雜言

奉君金卮之美酒璫瑁玉匣之雕琴七綵芙蓉之羽帳

九華蒲萄之錦衾紅顏零落歲將暮寒光宛轉時欲沈  
願君裁悲且減思聽我抵節行路吟不見柏梁銅雀上  
寧聞古時清吹音

洛陽名工鑄為金博山千斷復萬鏤上刻秦女攜手仙  
承君清夜之歡娛列置幃裏明燭前外發龍鱗之丹綵  
內含麝芬之紫烟如今君心一朝異對此長歎終百年  
璇閨玉墀上椒閣文窻繡戶垂羅幕中有一人字金蘭  
被服纖羅采芳藿春燕參差風散梅開幃對景弄春爵

含歌攬涕恒抱愁

玉臺作  
不能言

人生幾時得為樂寧作野中

之雙鳧不願雲間之別鶴

瀉水置平地各自東西南北流人生亦有命安能行歎  
復坐愁酌酒以自寬舉杯斷絕歌路難心非木石豈無  
感吞聲躑躅不敢言

君不見河邊草冬時枯死春滿道君不見城上日今暝

沒盡

一作山

去明朝復更出今我何時當得然一去永滅

入黃泉人生苦多歡樂少意氣敷腴在盛年且願得志



數相就牀頭恒有沽酒錢功名竹帛非我事存亡貴賤  
付皇天

對案不能食拔劍擊柱長歎息丈夫生世會幾時安能  
蹀躞垂羽翼棄置罷官去還家自休息朝出與親辭暮  
還在親側弄兒牀前戲看婦機中織自古聖賢盡貧賤  
何況我輩孤且直

愁思忽而至跨馬出北門舉頭四顧望但見松柏園荆  
棘鬱蹲蹲中有一鳥名杜鵑言是古時蜀帝魂聲音哀

苦鳴不息羽毛憔悴似人髣飛走樹間啄蟲蟻豈憶往  
日天子尊念此死生變化非常理中心惻愴不能言

中庭五株桃一株先作花陽春妖冶二三月從風簸蕩  
落西家西家思婦見悲惋零淚霑衣撫心歎初送我君  
出戶時何言淹留節迴換牀席生塵明鏡垢纖腰瘦削  
髮蓬亂人生不得恒稱意惆悵徒倚至夜半

剉藥染黃絲黃絲歷亂不可治我昔與君始相值爾時  
自謂可君意結帶與君言死生好惡不相置今日見我

顏色衰意中索寞與先異還君金釵玳瑁簪不忍見之

一作  
此 益愁思

君不見薜華不終朝須臾奄冉零落銷盛年妖艷浮華  
輩不久亦當詣塚頭一去無還期千秋萬歲無音詞孤魂  
杳杳空隴間獨魄徘徊遶墳基但聞風聲野鳥吟豈憶  
平生盛年時為此令人多悲悵君當縱意自熙怡

君不見枯籜走階庭何時復青著故莖君不見亡靈蒙  
享祀何時傾杯竭壺罌君當見此起憂思寧反得與時

人爭人生倏忽如絕電華年盛德幾時見但令縱意存  
高尚旨酒嘉肴相胥讌持此從朝竟夕暮差得亡憂消  
愁怖胡為惆悵不能已難盡此曲令君忤

今年陽初花滿林明年冬末雪盈岑推移代謝紛交轉  
我君邊戍獨稽沈執袂分別已三載邇來寂淹無分音朝  
悲慘慘遂成滴暮思遶遶最傷心膏沐芳餘久不御蓬  
首亂鬢不設簪徒飛輕埃舞空帷粉筐黛器靡復遺自  
生留世苦不幸心中惕惕恒懷悲

春禽喈喈旦暮鳴最傷君子憂思情我初辭家從軍僑  
榮志溢氣干雲霄流浪漸冉經三齡忽有白髮素髭生  
今暮臨水拔已盡明日對鏡復已盈但恐羈死為鬼客  
客思寄滅生空精每懷舊鄉野念我舊人多悲聲忽見  
過客問何我寧知我家在南城答云我曾居君鄉知君  
遊宦在此城我行離邑已萬里今方羈役去遠方來時  
聞君婦閨中孀居獨宿有貞名亦云悲朝泣閒房又聞  
暮思淚霑裳形容憔悴非昔悅蓬鬢衰顏不復粧見此

令人有餘悲當願君懷不暫忘

君不見少壯從軍去白首流離不得還故鄉  
宵宵日夜隔音塵斷絕阻河關朔風蕭條白雲飛胡笳哀急邊氣寒  
聽此愁人兮奈何登山遠望得留顏將死胡馬跡能見妻子難  
男兒生世輒軻欲何道綿憂推抑起長歎

君不見柏梁臺今日丘墟生草萊君不見阿房宮寒雲澤雉棲  
其中歌妓舞女今誰在高墳累累滿山隅長袖紛紛徒競世  
非我昔時千金軀隨酒逐樂任意去莫令

含歎下黃壚

君不見冰上霜表裏陰且寒雖蒙朝日照信得幾時安  
民生故如此誰令摧折強相看去年去年來自如削白髮  
零落不勝冠

君不見春鳥初至時百草含青俱作花寒風蕭索一旦  
至竟得幾時保光華日月流邁不相饒令我愁思怨恨  
多

諸君莫歎貧富貴不由人丈夫四十彊且仕余當二十

弱冠辰莫言草木委冬雪會應蘇息遇陽春對酒叙長  
篇窮途運命委皇天但願樽中九醞滿莫惜牀頭百個  
錢直須優游卒一歲何勞辛苦事百年

梅花落

中庭雜樹多偏為梅咨嗟問君何獨然念其霜中能作  
花露中能作實搖蕩春風媚春日念爾零落逐寒風徒  
有霜華無霜質

代淮南王

玉臺分朱城以  
下別作一首



淮南王好長生服食鍊氣讀仙經琉璃作盃牙作盤金鼎  
玉匕合神丹合神丹戲紫房紫房綵女弄明璫鸞歌鳳  
舞斷君腸朱城九門門九閨願逐明月入君懷入君懷  
結君佩怨君恨君恃君愛築城思堅劒思利同盛同衰  
莫相棄

代雉朝飛

雉朝飛振羽翼專場挾雌恃彊力媒已驚翳又逼蒿間  
潛穀盧矢直勿繡頸碎錦臆絕命君前無怨色握君手

執杯酒意氣相傾死何有

代北風涼行

北風涼雨雪霽京洛女兒多妍粧遙豔帷中自悲傷沈  
吟不語若有忘問君何行何當歸苦使妾坐自傷悲慮  
年至慮顏衰情易復恨難追

代空城雀

雀乳四穀空城之阿朝食

一作拾

野粟夕飲冰河高飛畏

鴟鵂下飛畏網羅辛傷伊何言怵迫良已多誠不及青

鳥遠食玉山禾猶勝吳宮燕無罪得焚窠賦命有厚薄  
長歎欲如何

代夜坐吟

冬夜沈沈夜坐吟含聲未發已知心霜入幕風度林朱  
燈滅朱顏尋體君歌逐君音不貴聲貴意深

代春日行 三言

獻歲發吾將行春山茂春日明園中鳥多嘉聲梅始發柳  
始青汎舟艫齊擢驚奏採菱歌鹿鳴微風起波微生絃亦

發酒亦傾入蓮池折桂枝芳袖動芬葉披兩相思兩不知

詩

侍宴覆舟山二首

勅為柳元景作  
以下五言

息雨清上郊開雲照中縣游軒越丹居暉燭集涼殿凌  
高躋飛楹追焱起流宴極苑含靈羣崑庭藏物變明輝  
爍神都麗氣冠華甸目遠幽情周醴洽深恩遍

繁霜飛玉闥愛景麗皇州清蹕戒馳路羽蓋佇宣游神  
居既崇盛崑嶮信環周禮俗陶德聲昌會溢民謳慙無

勝化質謬從雲雨遊

從拜陵登京峴

孟冬十月交，殺盛陰欲終。  
風烈無勁草，寒甚有凋松。  
軍井冰畫結，士馬氍夜重。  
晨登峴山首，霜雪凝未通。  
息鞍循隴上，支劒望雲峯。  
表裏觀地險，升降究天容。  
東嶽履如礪，瀛海安足窮。  
傷哉良永矣，馳光不再中。  
衰賤謝遠願，疲老還舊邦。  
深德竟何報，徒令田陌空。

蒜山被始興王命作

暮冬霜朔嚴地閉泉不流玄武藏木陰丹鳥還養羞勞  
農澤既周役車時亦休高簿符好舊藻駕及時遊鹿苑  
豈淹睎兔園不足留升嶠眺日軌臨迥望滄洲雲生  
玉堂裏風靡銀臺甌陂石類星懸與木似烟浮形勝信  
天府珍寶麗皇州白日迴清景芳艷洽歡柔參差出寒  
吹聽戾江上謳王德愛文雅飛潮灑鳴球美哉物會昌  
衣道服光猷

登廬山

懸裝亂水區薄旅次山楹千巖盛阻積萬壑勢迴紫巖  
從高昔貌紛亂襲前名洞澗窺地脉聳樹隱天經松磴  
上迷密雲竇下縱橫陰水實夏結炎樹信冬榮嘈噴晨  
鷗思呌嘯夜猿清深崖伏化跡穹岫閱長靈乘此樂山  
性重以遠遊情方躋羽人途永與煙霧并

登廬山望石門

訪世失隱淪從山異靈士明發振雲冠升嶠遠棲趾高  
岑隔半天長崖斷千里氛霧承星辰潭壑洞江汜蘄絕

類虎牙嶺岼象熊耳埋冰或百年韜樹必千祀雞鳴清  
澗中猿嘯白雲裏瑤波逐穴開霞石觸峯起迴互非一  
形參差悉相似傾聽鳳管賓緬望釣龍子松桂盈膝前如  
何穢城市

從登香爐峯

辭宗盛荆夢登歌美鳧繹徒收杞梓饒曾非羽人宅羅  
景鵲雲扃沾光扈龍策御風親列涂乘山窮禹跡含嘯  
對霧岑延蘿倚峯壁青冥搖煙樹穹跨負天石霜崖滅



土膏金澗測泉脉旋澗抱星漢乳竇通海碧谷館駕鴻  
人巖棲咀丹客殊物藏珍怪竒心隱仙籍高世伏音華  
綿古遁精魄蕭瑟生哀聽參差遠驚覲慙無獻賦才洗  
汗奉毫帛

從庾中郎遊園山石室

荒塗趣山楹雲崖隱靈室岡澗紛縈抱林障沓重密昏  
昏磴路深活活梁水疾幽隅秉書燭地牖窺朝日怪石  
似龍章瑕壁麗錦質洞庭安可窮漏井終不溢沈空絕

景聲崩危坐驚慄神化豈有方妙象竟無述至哉鍊玉  
人處此長自畢

登翻車峴

高山絕雲霓深谷斷無光晝夜淪霧雨冬夏結寒霜淖  
坂既馬領磧路又羊腸畏塗疑旅人忌輟覆行箱升岑  
望原陸四眺極川梁游子思故居離客遲新鄉新知有客  
慰追故游子傷

登黃鶴磯

木落江渡寒鴈還風送秋臨流斷商絃瞰川悲棹謳適  
郢無東轅還藝文作過夏有西浮三崖隱丹磴九派引滄流  
淚竹感湘別弄珠懷漢遊豈伊藥餌泰得奪旅人憂

登雲陽九里埭

宿心不復歸流年抱衰疾既成雲雨人悲緒終不一徒  
憶江南聲空錄齊后瑟方絕紫絃思豈見繞梁日

自礪山東望震澤

瀾漫潭洞波合沓崿嶂雲漲島遠不測岡澗近難分幽

篋愁暮見思鳥傷夕聞以此藉沈疴棲迹別人羣結言  
非盡書有念豈敷文

三日遊南苑

採蘋及華月追節逐芳雲騰蒨溢林疏麗日暝山文清  
潭圓翠會花薄緣綺紋合樽遽景斜折榮去組芬

贈故人馬子喬六首

躑躅城上羊攀隅食玄草俱共日月輝昏明獨何早夕  
風飄野籜飛塵被長道親愛難重陳懷憂坐空老

寒灰滅更然夕華晨更鮮春冰雖暫解冬水復還堅佳  
人捨我去賞愛長絕緣歡至不畱日感物輒傷年

松生隴坂上百尺下無枝東南望河尾西北隱崑崖野  
風振山籟朋鳥夜驚離悲涼貫年節蔥翠恒若斯安得  
草木心不怨寒暑移

種橘南池上種杏北池中池北既少露池南又多風早  
寒逼晚歲衰恨滿秋容湘濱有靈鳥其字曰鳴鴻一抱  
繒繳痛長別遠無雙

皎如川上鵲，赫似握中丹。宿心誰不欺，明白古所難。憑  
楹觀皓露，灑酒盪憂顏。永念平生意，窮光不忍還。淹留  
徒攀桂，延佇空結蘭。

雙劍將離別，先在匣中鳴。烟雨交將夕，從此遂分形。雌

沈吳江裏

玉臺作水

雄飛入楚城。吳江深無底，楚關有崇扃。

一為天地別，豈直限幽明。神物終不隔，千祀儻還并。

### 答客

幽居屬有念，合意未連詞。會客從外來，問君何所思。澄

神自惆悵嘿慮久迴疑謂賓少安席方為子陳之我以  
華門士負學謝前基愛賞好徧越放縱少矜持專求遂  
性樂不計緝名期歡至獨斟酒憂來輒賦詩聲交稍希  
歇此意更堅滋浮生急馳電物道險絃絲深憂寡情謬  
進伏兩睽時願賜卜身要得免後賢嗤

和王丞

限生歸有窮長意

一作憶

無已年秋心日迫絕春思坐連

綿銜協曠古願斟酌高代賢迹俱浮海採藥共還山

夜聽橫石波朝望宿巖烟明澗子沿越飛蘿予縈牽性  
好必齊遂迹幽非妄傳滅志身世表藏名琴酒間

日落望江贈荀丞

旅人乏愉樂薄暮增思深日落嶺雲歸延頸望江陰亂  
流漲大壑長霧匝高林林際無窮極雲邊不可尋惟見  
獨飛鳥千里一揚音惟其感物情則知游子心君居帝  
京內高會日揮金豈念慕羣客咨嗟戀景沈

秋日示休上人



枯桑葉易零疲客心易驚今茲亦何早已聞絡緯鳴迴  
風滅且起卷蓬息復征愴愴簾上寒悽悽帳裏情物色  
延暮思霜霧逼朝榮臨堂觀秋草東西望楚城百物方  
蕭瑟坐歎從此生

答休上人

酒出野田稻菊生高岡草味貌復何奇能令君傾倒玉  
椀徒自羞為君慨此秋金盞覆牙枰何為心獨愁

吳興黃浦亭庾中郎別

風起洲渚寒雲上日無輝連山眇烟霧長波迴難依旅  
鴈方南過浮客未西歸已經江海別復與親眷違奔景  
易有窮離袖安可揮懽觴為悲酌歌服成泣衣溫念終  
不渝藻志遠存追役人多牽滯顧路慙奮飛昧心附遠  
翰炯言藏佩章

與伍侍郎別

民生如野鹿知愛不知命飲翫具攢聚翹陸歛驚迸傷  
我慕類心感爾食革性漫漫鄢郢途渺渺淮海逕子無

金石質我有犬馬病憂樂安可言離會孰能定欽哉慎  
所宜砥德乃為盛貧游不可忘久交念敦敬

送別王宣城

發郢流楚思涉淇興衛情既逢青春獻復值白蘋生廣  
望周千里江郊謁微明舉爵自惆悵歌管為誰清潁陰  
騰前藻淮陽流昔聲樹道慕高華屬路佇深馨

送從弟道秀別

參差生密念躑躅行思悲悲思戀光景密念盈一作歲

彌

時歲時多阻折光景乏安怡以此苦風情日夜驚懸旗  
登山臨朝日揚袂別所思浸淫旦潮廣瀾漫宿雲滋天  
陰懼先發路遠常早辭篇詩後相憶杯酒今無持游子  
苦行役冀會非遠期

贈傅都曹別

輕鴻戲江潭孤鴈集洲沚邂逅兩相親緣念共無已風  
雨好東西一隔頓萬里追憶栖宿時聲容滿心耳落日  
川渚寒愁雲繞天起短翮不能翔徘徊烟霧裏

和傅大農與僚故別

絕節無緩響傷鴈有哀音非同年歲意誰共

一作異

別離

心伊昔謬通塗冠屣預人林浮江望南嶽登潮窺海陰  
孰謂游居淺慕美久相深萋萋春草秀嚶嚶喜候禽辰  
物盡明茂尊盛獨幽沈之子安所適我方栖舊岑墜歡  
豈更接明愛邈難尋

送盛侍郎餞候亭

霜霰襲冠帶驅駕越城闌北臨出塞道南望入鄉津高

墉宿寒霧平野起秋塵君為坐堂子我乃負羈人欣悲  
豈等志甘苦誠異身結涕園中草憔悴悲此春

與荀中書別

勞舟厭長浪疲旆倦行風連翩感孤志邦濶傷賤躬親  
交篤離愛眷戀置酒終敷文勉征念發藻慰愁容思君  
吟涉洧撫已謠渡江慙無黃鶴翅安得久相從願遂宿  
知意不使舊山空

從過舊宮

肅裝屬雲旅奉荊承末塗嚴恭履桑梓加敬覽粉榆靈  
命蘊川瀆帝寶伏篇圖虎變由石紐龍翔自鼎湖功冠  
生民始道妙神器初宮陛留前制歌思溢今衢餘祥見  
雲物遺像存陶漁泉流信清泌原野實甘荼豈伊愛鄴  
鄔天險兼上腴東秦邦北門非親誰克居仁聲日月懋  
惠澤雲雨敷盧令美何歇唐風久不渝微臣逢世慶征  
賦備人徒空費行葦德採束謝生芻

從臨海王上荆初發新渚

客行有苦樂但問客何行  
扳龍不待翼附驥絕塵冥  
梁珪分楚牧羽鷄指全荆  
雲艦掩江汜千里被連旌  
戾戾旦風迢嘈嘈晨鼓鳴  
收纜辭帝郊揚棹發皇京  
狐兔懷窟志犬馬戀主情  
撫襟同太息相顧俱涕零  
奉役塗未啟思歸思已盈

還都道中三首

悅懌遂還心踊躍貪至勤  
鳴雞戒征路暮息落日分  
急流騰飛沫回風起江濱  
孤獸啼夜侶離鴻噪霜羣  
物哀



心交橫聲切思紛紛歎慨訴同旅美人無相聞

風急訊灣浦裝高偃檣舳舻聽江上波遠極千里目寒  
律驚窮蹊爽氣起喬木隱隱日沒岫瑟瑟風發谷鳥還  
暮林諠潮上冰結狀夜分霜下淒悲端出遙陸愁來攢  
人懷羈心苦獨宿

久宦迷遠川川廣每多懼薄止閭邊亭闕歷險程路靈  
霽冥隅岫濛昧江上霧時涼籟爭吹流洄浪奔趣

一作注

惻焉增愁起搔首東南顧茫然荒野中舉目皆凜素回風揚

江泌寒禽棲動樹太息終晨漏企我歸颺遇

上尋陽還都道中

昨夜宿南陵今旦入蘆洲客行惜日月崩波不可留侵

星赴早路畢景逐前儔鱗鱗夕雲起獵獵晚

一作曉

風道

騰沙鬱黃霧翻浪揚白鷗登艫眺淮甸掩泣望荆流絕  
目盡平原時見遠煙浮倏忽坐還合俄思甚兼秋未嘗違  
戶庭安能千里遊誰令乏古節貽此越鄉憂

還都至三山望石頭城

泉源安首流川末澄遠波晨光被水族曉氣歇林阿兩  
江皎平迴三山鬱駢羅南帆望越嶠北榜指齊河關扁  
繞天邑襟帶挹尊華長城非壑嶮峻岨似荆茅搢樓貫  
白日搞堞隱丹霞征夫喜觀國遊子遲見家流連入京  
引躑躅望鄉歌彌前歎景促逾近勸路多偕萃猶如茲  
弘易將謂何

還都口號

分壤蕃帝華列正謁皇宮禮譙及年暇朝奏因歲通維

舟歇金景結棹俟昌風鉦歌首寒物歸吹踐開冬陰沈  
烟塞合蕭瑟涼海空馳霜急歸節幽雲慘天容旌鼓貫  
玄塗羽鷁被長江君王遲京國游子思鄉邦思世共渝洽  
身願兩扳逢勉哉河濟客勤爾尺波功

行京口至竹里

高柯危且竦鋒石橫復仄複澗隱松聲重崖伏雲色冰  
閉寒方壯風動鳥傾翼斯志逢凋嚴孤游值曛逼兼塗  
無憩鞍半菽不遑食君子樹令名細人効命力不見長

河水清濁俱不息

發後渚

江上氣早寒仲秋始霜雪從軍乏衣糧方冬與家別蕭  
條背鄉心悽愴清渚發涼埃晦平皋飛潮隱修樾孤光  
獨徘徊空烟視昇滅塗隨前峯遠意逐後雲結華志分  
馳年韶顏慘驚節推琴三起歎聲為君斷絕

岐陽守風

差池玉繩高掩藹瑤井沒廣岸屯宿陰懸崖棲歸月役

人喜先馳軍令申早發洲迴風正悲江寒霧未歇飛雲  
日東西別鶴方楚越塵衣孰揮瀚蓬思亂光髮

發長松遇雪

土牛既送寒冥陸方決馳振風搖地局封雪滿空枝江  
渠合為陸天野浩無涯飲泉凍馬骨斲冰傷役疲昆明  
豈不慘黍谷寧可吹

詠史

五都矜財雄三川養聲利百金不市死明經有高位京

城十二衢飛甍各鱗次仕子影華纓游客竦輕轡明星  
晨未晞軒蓋已雲至賓御紛颯沓鞍馬光照地寒暑在  
一時繁華及春媚君平獨寂寞身世兩相棄

蜀四賢詠

司馬相如  
王褒

嚴君平  
揚雄

渤渚水浴鳧春山玉抵鵲皇漢方盛明羣龍滿階閣君  
平因世閒得還守寂寞閉簾注道德開卦述天爵相如  
達生旨能屯復能躍陵令無人事毫墨時灑落褒氣有  
逸倫雅續信炳博如令聖納賢金璫易羈絡良遮神明

遊豈伊覃思作玄經不期賞蟲篆憂散樂首路或參差  
投駕均遠託身表既非我生內任豐薄

擬古八首

魯容事楚王懷金襲丹素既荷主人恩又蒙令尹顧日  
宴罷朝歸鞍馬塞衢路宗黨生光輝賓僕遠傾慕富貴  
人所欲道得亦何懼南國有儒生迷方獨淪誤伐木清  
江湄設置守冕兔

十五諷詩書篇翰靡不通弱冠參多士飛步游秦宮側



觀君子論預見古人風兩說窮舌端五車摧筆鋒蓋當  
白璧貶恥受聊城功晚節從世務乘障遠和戎解佩襲  
犀渠卷裘奉廬弓始願力不及安知今所終

幽并重騎射少年好馳逐韁帶佩雙鞬象弧挿雕服獸  
肥春草短飛鞚越平陸朝遊鴈門上暮還樓煩宿石梁  
有餘勁驚雀無全目漢虜方未和邊城屢翻覆留我一  
白羽將以分虎竹

鑿井北陵隈百丈不及泉生事本瀾漫何用獨精堅幼

壯重寸陰衰暮及輕年放駕息朝歌提爵止中山日夕  
登城隅周迴視洛川街衢積凍草城郭宿寒烟繁華悉  
何在宮闕久崩填空謗齊景非徒稱夷叔賢

伊昔不治業倦游觀五都海岱饒壯士蒙泗多宿儒結  
髮起躍馬垂白多講書呼我升上席陳解發瓢壺管仲  
死已久墓在西北隅後面崔嵬者桓公舊塚廬君來誠  
既晚不覩崇明初玉琬徒見傳交友義漸疎

束薪幽篁裏刈黍寒澗陰朔風傷我肌號鳥驚思心歲

暮井賦訖程課相追尋田租送函谷獸藁輸上林河渭  
冰未開關隴雪正深笞擊官有罰阿辱吏見侵不謂乘  
軒意伏櫪還至今

河畔草未黃胡鴈已矯翼秋螢扶戶吟寒婦成夜織去  
歲征人還流傳舊相識聞君上隴時東望久歎息宿昔  
改衣帶朝旦

玉臺作旦暮

異容色念此憂如何夜長愁更多

明鏡塵匣中瑤琴生網羅

蜀漢多奇山仰望與雲平陰崖積夏雪陽谷散秋容朝

朝見雲歸夜夜聞猿鳴憂人本自悲孤客易傷情臨堂  
設樽酒留酌思平生石以堅為性君勿輕素誠

紹古辭七首

橘生湘水側非陋人莫傳逢君金華宴得在玉几前三  
川窮名利京洛富妖妍思榮難久恃隆寵易衰偏觀席  
妾懷愴覩翰君泣然徒抱忠孝志猶為葑菲遷

昔與君別時鸞妾初獻絲何言年月駛寒衣已擣治絲  
繡多廢亂篇帛久塵縑離心壯為劇飛念如懸旗石席

我不爽德音君勿欺

瑟瑟涼海風竦竦寒山木紛紛羈思盈慊慊夜弦促訪  
言山海路千里歌別鶴絃絕空咨嗟形音誰賞錄辛苦  
異人狀美貌改如玉徒畜巧言鳥不解心款曲

孤鴻散江嶼連翩遵渚飛合嘶衡桂浦馳顧河朔幾攢  
攢勁秋木昭昭淨冬暉牕前滌歡爵帳裏縫舞衣芳歲  
猶自可日夜望君歸

憑檻翫夜月迴眺出谷雲還山路已遠往海不及羣徘徊

徊清淮內顧慕廣江濱物情乖喜歇守操古難聞三越  
豐少姿容態傾動君

開黛覩容

一作朝

顏臨鏡訪遙塗君子事河源彌祀闕還

書春風掃地起飛塵生綺疏文桂為誰設羅帳空卷舒  
不怨身孤寂但念星隱隅

暖歲節物早萬萌迎春達春風夜嫵媚春霧朝暝霽軟  
蘭葉可採柔桑條易撝怨咽對風景悶瞢守閨闥天賦  
愁民命含生但契濶憂來無行伍歷亂如單葛

學古

北風十二月雪下如亂巾實是愁苦節惆悵憶

一作情別

親會得兩少妾同是洛陽人嫖絲好眉目閑麗美腰身  
凝膚皎若雪明淨色如神嬌愛生盼矚聲媚起朱唇衿  
服襟縱續首飾亂瓊珍調絃俱起舞為我唱梁塵人生  
貴得意懷願待君中幸值嚴冬暮幽夜方未晨齊衾久  
兩設角枕已雙陳願君早休息留歌待三春

古辭

容華不待年何為客遊梁九月寒陰合悲風斷君腸歎  
息空房婦幽思坐自傷勞心結遠路惆悵獨未央

擬青青陵上栢

涓涓亂江泉綿綿橫海烟浮生旅昭世空事歎華年書  
翰幸閒暇我酌子縈絃飛鑣出荆路驚服指秦川渭濱  
富皇居鱗館匝河山輿童唱秉椒擢女歌采蓮乎愉鸞  
閣上窈窕鳳楹前娛生信非謬安用求多賢

學劉公幹體五首



欲官乏王事結主遠恩私為身不為名散書徒滿帷連  
冰上冬月披雪拾園葵聖靈燭區外小臣良見遺

皚皚寒野霧蒼蒼陰山栢樹迴霧縈集山寒野風急歲  
物盡淪傷孤貞為誰立賴樹自能貞不計迹幽澀

胡風吹朔雪千里度龍山集君瑤臺上飛舞兩楹前茲  
晨自為美當避艷陽天艷陽桃李節皎潔不成妍

荷生淥泉中碧葉齊如規迴風蕩流霧珠水逐條垂彪  
炳此金塘藻耀君玉池不愁世賞絕但畏盛明移

藝文  
作張

華

白日正中時天下共明光北園有細草當晝正含霜  
非榮頃如此何用獨芬芳抽琴為爾歌絃斷不成章

擬阮公夜中不能寐

漏分不能臥酌酒亂繁憂惠氣憑夜清素景緣隙流  
鳴鶴時一聞千里絕無儔佇立為誰久寂寞空自愁

學陶彭澤體

奉和王義興

長憂非生意短願不須多但使尊酒滿朋舊數相過秋

風七八月清露潤綺羅提瑟當戶坐歎息望天河保此  
無傾動寧復滯風波

數詩

一身仕闕西家族滿山東二年從車駕齊祭甘泉宮三  
朝國慶畢休沐還舊邦四牡曜長路輕蓋若飛鴻五侯  
相餞送高會集新豐六樂陳廣坐組帳揚春風七盤起  
長袖庭下列歌鍾八珍盈雕俎綺肴紛錯重九族共瞻  
遲賓友仰徽容十載學無就善宦一朝通

建除詩

建旗出燉煌西討屬國羗除去徒與騎戰車羅萬箱滿  
山又填谷投鞍合營牆平原亘千里旗鼓轉相望定舍後  
未休候騎敕前裝執戈無暫頓彎弧不解張破滅西零  
國生虜郅支王危亂悉平蕩萬里置闕梁成軍入玉門  
士女獻壺漿收功在一時歷世荷餘光開壤襲朱紱左  
右佩金章閉帷草太玄茲事殆愚狂

白雲

探靈喜解骨測化善騰天情高不戀俗厭世樂尋仙鍊  
金宿明館屑玉止瑤淵鳳歌出林闕龍駕戾蓬山凌崖  
采三露攀鴻戲五烟昭昭景臨霞湯湯風媚泉命娥雙  
月際要媛兩星間飛虹眺卷河汎霧弄輕絃笛聲謝廣  
賓神道不復傳一逐白雲去千齡猶未旋

臨川王服竟還田里

送舊禮有終事君慚懦薄稅駕罷朝衣歸志願巢壑尋  
思邈無報退命愧天爵捨耨將十齡還得守場藿道經

盈竹筍農書滿塵閣愴愴秋風生戚戚寒綠作豐霧粲  
草華高月麗雲嶢屏跡勤躬稼衰疾倚芝藥顧此謝人  
羣豈直止商洛

行藥至城東橋

雞鳴關吏起伐鼓早通晨嚴車臨迥陌延瞰歷城闌蔓  
草緣高隅修楊夾廣津迅風首旦發平路塞飛塵擾擾  
遊宦子營營市井人懷金近從利撫劍遠辭親爭先萬  
里塗各事百年身開芳及稚節含綵吝驚春尊賢永照

灼孤賤長隱淪容華坐銷歇端為誰苦辛

園中秋散

負疾固無豫晨衿悵已單氣交蓬門疎風數園草殘荒  
墟半晚色幽庭憐夕寒既悲月戶清復切夜蟲酸流枕  
商聲苦騷殺年志閑臨歌不知調發興誰與歡儻結絃  
上情豈孤林下彈

觀圃人藝植

善賈笑蠶漁巧宦賤農牧遠養遍闕市深利窮海陸乘

軺實金羈當壚信珠服居無逸身技安得坐梁肉徒承  
屬生幸政緩吏平睦春畦及耘藝秋場早芟築澤閭既  
繁高山營又登熟抱挿壠上餐結茅野中宿空織已尚  
淳寧知俗翻覆

遇銅山掘黃精

土肪閤中經水芝韜內策

一作籍

寶餌緩童年命藥駐衰

歷矧蓄終古情重拾烟霧迹羊角棲斷雲榼口流隘石  
銅谿晝森沈乳竇夜涓滴既類風門磴復象天井壁蹠



蹠寒葉離漭漭秋水積松色隨野深月露依草白空守  
江海思豈懷梁鄭客得仁古無怨順道今何惜

見賣玉器者

并序

見賣玉器者或人欲買疑其是珉不肯成市聊作  
此詩以戲買者

涇渭不可雜珉玉當早分子實舊楚客蒙俗謬前聞安  
知理孚采豈識質明溫我方歷上國從洛入函轅揚光  
十貴室馳譽四豪門奇聲振朝邑高價服鄉村寧能與

爾曹瑜瑕稍辨論

懷遠人

哀樂生有端離會起無因去事難重念恍惚似如神  
屬期眇起遠後遇邈無辰馳風掃遙路輕蘿含夕塵  
思君成首疾欲息眉不伸

夢歸鄉

玉臺作  
夢還詩

銜淚出郭門撫劍無人遠沙風暗空

玉臺作塞

起離心眷鄉

幾夜分就孤枕夢想暫言歸嬌婦當戶歎縹絲

外編作  
搔首

復鳴機慊歎論久別相將還綺閣歷歷簷下涼  
朧朧帳裏暉  
刈蘭爭芬芳採菊競歲蕤開奩奪香蘇探袖解纓徽夢中長  
路近覺後大江遶驚起空嘆息恍惚神魂飛白水漫漫浩浩  
高山壯巍巍波瀾異往復風霜改榮衰此土非吾土慊  
慨當告誰

春羈

征人歎道遐去鄉悵路邇佳期每無從淮陽非尺咫春  
日起游心勞情出徒倚岫遠雲烟綿谷屈泉靡迤風起

花四散露濃條

闕

暄妍正在茲摧抑多嗟思嘶聲名

一作邊堅豈我箱中紙染翰餉君琴新聲憶解子

歲暮悲

霜露迭濡潤草木互榮落日夜改運周今悲復如昨書  
色苦沈陰白雪夜迴薄皦潔冒霜鴈飄揚出風鶴天寒  
多顏苦妍容逐丹壑絲綯千里心獨宿之然諾歲暮美  
人還寒壺與誰酌

在江陵歎年傷老

五難未易夷三命戒淵抱方瞳起松髓頰髮疑桂腦役  
生良自休大患安足保開簾窺景夕備屬雲物好翱翔  
燕弄風嫋嫋柳垂道池瀆亂蘋萍園援美花草節如驚  
灰異零落就衰老

夜聽妓二首

夜來坐幾時銀漢傾露落澄滄入閨景歲華被園藿絲  
管感暮情哀音繞梁作芳盛不可恒及歲共為樂天明  
坐當散琴酒駛絃酌

蘭膏消耗夜轉多  
亂筵雜坐更絃歌  
傾情逐節寧不苦  
特為盛年惜容華

詠月城西門解中

始見西南樓  
纖纖如玉鉤  
末映東北墀  
娟娟似娥眉  
娥眉蔽珠櫳  
玉鉤隔銷牕  
三五二八時  
千里與君同  
夜移

衡漢落徘徊帷戶

玉臺作幌

中歸華先委露  
別葉蚤辭風  
客

游厭苦辛仕子倦  
飄塵休澣自公日  
宴慰及私辰  
蜀琴

抽白雪郢曲發

玉臺作繞

陽春看乾酒未闌  
金壺啟夕淪  
迴

軒駐輕蓋留酌待情人

喜雨

奉敕作

營社達羣陰屯雲

藝文作連宮

拊積陽河并起龍蒸日魄斂

游光族雲飛泉室震風沈羽鄉升霽浹地維傾潤瀉天

潢平灑周海嶽曲潦溢川莊驚雷鳴桂渚迴涓流玉堂

珍木抽翠條炎卉擢朱芳闕市欣九賦京廩開萬箱無

謝堯為君何用知栢皇

苦雨

連陰積澆灌滂沱下霖亂沈雲日夕昏驟雨淫朝旦蹊  
寧走獸稀林寒鳥飛晏密霧冥下溪聚雲屯高岸野雀無  
所依羣雞聚空館川梁日已廣懷人邈渺漫徒酌相思  
酒空急促明彈

詠白雪

白珪誠自白不如雪光妍工隨物動氣能逐勢方圓無  
妨玉顏媚不奪素繒鮮投心障苦節隱迹避榮年蘭焚  
石既斷何用恃芳堅



三日

氣暄動思心柳青起春懷時艷憐花藥服淨俛登臺提觴  
野中飲愛心烟未開露色染春草泉源潔冰苔泥泥濡  
露條娟娟承風栽鳬雛掇苦薺黃鳥銜櫻梅解衿欣景  
預臨流競覆杯美人竟何在浮心空自摧

詠秋

秋蘭徒晚綠流風漸不親飈我垂愚幕驚此梁上塵沈  
陰安可久豐景將遂淪何由忽靈化暫見別離人

秋夕

慮涕擁心用夜默發思機幽閨溢涼吹閒庭滿清暉紫  
蘭花已歇青梧葉方稀江上淒海戾漢曲驚朔霏髮班  
悟壯晚物謝知歲微臨宵嗟獨對撫賞怨情違躊躇空  
明月惆悵徒深帷

秋夜二首

夜久膏既竭啟明旦未央環情倦始復空閨起晨裝幸  
承天光轉曲影入幽堂徘徊集通隙宛轉燭迴梁帷風

自卷舒簾露視成行歲役急窮晏生慮備溫涼絲紈風  
染濯綿綿夜裁張冬雪旦夕至公子乏衣裳華心愛零  
落非直惜容光願君剪衆念且共覆前觴

遁迹避紛喧貨農棲寂寞荒徑馳野鼠空庭聚山雀既  
遠人世歡還賴泉卉樂折柳樊場圃負綆汲潭壑霽旦  
見雲峯風夜聞海鶴江介早寒來白露先秋落麻壘方  
結葉瓜田已掃籜傾暉忽西下迴景思華幕攀蘿席中  
軒臨觴不能酌終古自多恨幽悲共淪鑠

和王護軍秋夕

散漫秋雲遠蕭蕭霜月寒驚飈西北起孤鴈夜往還開  
軒當戶牖取琴試一彈停歌不能和終曲久辛酸金氣  
方勁殺隆陽微且單泉涸甘井竭節徙芳歲殘生事各  
多少誰共知易難投章心蘊結千里途輕紈願託孤老  
暇觴思暫開餐

和王義興七夕

宵月向掩扉夜霧方當白寒機思孀婦秋堂泣征客匹

命無單年偶影有雙夕暫交金石心須臾雲雨隔

冬至

舟遷莊甚笑水流孔急歎景移風度改日至晷迴換眇  
眇負霜鶴皎皎帶雲鴈長河結欄玕層冰如玉岸哀哀  
古老容慘顏愁歲晏催促時過逼迫聚離散美人還未  
央鳴箏誰興彈

冬日

嚴風亂山起白日欲還次曛霧蔽窮天夕陰晦寒地烟

霾有氛氲精光無明異風急野田空饑禽稍相棄舍生  
共通閉懷賢敦為利天窺苟平圓寧得已偏媚瀉海有  
歸潮衰容不還穉君今且安歌無念老方至

望水

刷鬢垂秋日登高觀水長千澗無別源萬壑共一廣流  
駛巨石轉湍迴急沫上蒼蒼巔岸高照照寒洲爽東歸  
難忖惻日逝誰與賞臨川憶古事目孱千載想河伯自  
矜大海若沈渺莽

望孤石

江南多暖谷雜樹茂寒峯朱華抱白雪陽條熙朔風  
蚌節流綺藻輝石亂烟虹泄雲去無極駛波往不窮  
嘯歌清漏畢徘徊朝景終浮生會當幾歡酌每盈衷

山行見孤桐

桐生蒙石裏根孤地寒陰上倚崩岸勢下帶洞阿深  
奔泉冬激射霧雨夏霖霽未霜葉已肅不風條自吟  
昏明積苦思晝夜叫哀禽棄妾望掩淚逐臣對撫心  
雖以慰

單危悲涼不可任幸願見雕斲為君堂上琴

詠雙燕二首

雙燕戲雲崖羽翰始差池出入南閨裏經過北堂陲意  
欲巢君幕層楹不可窺沈吟芳歲晚徘徊韶景移悲歌  
辭舊愛銜淚覓新知

可憐雲中燕旦去暮來歸自知羽翅弱不與鵲爭飛寄  
聲謝飛鵲往事子毛衣瑣心誠貧薄巨公節榮衰陰山  
饒苦霧危節多勁威豈但避霜雪當做野人機



酒後

晨節無兩淹年意不俱處自非羽酌歡何用慰愁旅

講易

雲澤翔羽姬橫蓋招益人賁園無金尚履道易書紳

可愛

風帷閃珠帶月幌垂霧羅魏絜縫秋裳趙艷習春歌

夜聽聲

辭鄉不覺遠歡寡憂自繁何用慰秋望清燭視夜翻

咏老

軟顏收紅藥玄鬢生素華冉冉逝將老咄咄奈老何

春咏

節運同可悲莫若春光甚和風未及燠遺涼清且凜

字謎三首

二形一體四支八頭四八一八飛泉仰流

井字

頭如刀尾如鈎中央橫廣四角六抽右面負兩刃左邊

雙屬牛

龜字

乾之一九隻立無偶坤之二六宛然雙宿

土字

贈顧墨曹

昏明易遠離會難揆雲轍泉分西轡東軌

聯句

在荊州與張使君李居士聯句

橋磴支吾轍篁路拂輕鞍三尹無喜色一適或垂竿

與謝尚書莊三聯句

霞輝兮澗朗日靜兮川澄風輕桃欲開露重蘭未勝水

光溢兮松霧動山烟疊兮石露凝掩映晨物綵連綿夕  
羽興

月下登樓聯句

髣髴蘿月光繽紛篁霧陰樂來亂憂念酒至歇憂心

鮑博

士露入覺牖高螢蜚測苑深清氣澄永夜流吹不可臨

王延秀

密峯集浮碧疎瀾道瀛尋嗽玉延幽性攀桂藉知

音

荀原之

辰意事淪晦良歡戒勿侵昭景有遺馭疏賈無

留金

荀中書萬秋

漢魏六朝百三家集卷六十九